

四庫全書

子部

欽定四庫全書

冊府元龜卷三百四十六 宋 王欽若等 撰

將帥部

佐命第七

梁龐師古曹州南華人初以中涓從太祖性端愿未嘗
離左右及太祖鎮汴樹置戎伍始得馬五百匹即以師
古為偏將軍援陳破蔡累有戰功及朱珍以罪誅遂用
師古為都指揮使乃渡淮餉軍于廬壽攻滁州破天長

下高郵沿淮轉戰所至克捷尋代朱友裕領軍攻下徐州斬時溥首以獻遂移軍伐兗入中都寨于梁山敗朱瑄之衆襲至壘下又破朱瑾于清河從討汶陽與朱瑄朱瑾及晉將史儼兒戰于故樂亭大捷而回唐昭宗乾寧四年正月復統諸軍伐鄆拔之擒其帥朱瑄以獻始表為天平節度留後尋以功授徐州節度使後與淮人戰沒於陣

霍存洺州曲周縣人性驍勇善騎射在黃巢中已為將

領唐僖宗中和四年太祖大破巢軍于王藩渡時存與
葛從周張歸霸皆自巢軍來降太祖宥而納之其後破
王夏寨擊殷鐵林並在戰中尋佐朱珍取滑臺攻淄州
趣傅昌皆預戰立功蔡賊張郛在汴北存以三千人夕
犯其營破之用本部騎兵敗秦賢軍殺五千人連破四
寨盡得其輜重從討盧塘張郛殪萬餘人存功居多我
軍之圍濮州也有賊升眺樓大詬太祖怒甚召存射之
矢一發而屍殞其下賞賚甚厚復佐朱珍擒石璠破魏

師敗徐戎又佐龐師古至呂梁敗時溥二千餘衆以是累遷官初王師渡淮乏食不甚利唯存軍戰有功淮賊乃引退太祖之討宿州也葛從周以水壞其垣丁會以師乘其墉存戰壘外敗其軍宿人乃降明年佐柳王友裕擊時溥于碭山破之獲蕃將石君和等五十人是歲復與晉軍戰于馬牢川始入為前鋒出則後拒虜不敢逼乃渡河襲淇門殺三十餘人曹州刺史郭紹賓之來歸也存以師援之遂代其任始朱友裕以大軍伐鄆臨

其壁旣而師陷圍中以急來告存領二百騎馳赴擊退之太祖喜拔為諸軍都指揮使後與徐充之衆合戰於石佛山下中流矢而卒

張存敬譙郡人也性剛直有膽勇臨危無所畏憚唐僖宗中和中從太祖赴汴以其壯節頗見親昵首為右騎都尉從討巢蔡凡歷百戰多於危蹙之間顯有奇畧繇是頻立殊效光啟中李罕之會晉軍圍張崇奭於盟津太祖遣丁會葛從周及存敬同往馳救存敬引騎軍先

犯虜騎諸軍翼之虜騎大敗乃解河南之圍昭宗大順二年為諸軍都虞侯佐霍存董大軍收宿州以功奏加檢校兵部尚書太祖東征徐充存敬屢有俘斬之功凡受指顧皆與機會矢石所及必以身先太祖尤加優異以為行營都指揮使後累以戰功除護國將軍留後移宋州刺史將之任卒

寇彥卿大梁人也祖瑄父喬皆宣武軍牙校太祖鎮汴以彥卿將家子擢在左右弱冠選為通贊官太祖為元

帥府押牙領維州刺史羅紹威將殺牙軍遣使告于太祖太祖命彥卿使于魏密與紹威謀之竟成其事彥卿之力也彥卿身長八尺隆準方面語音如鐘善騎射好書史復善伺太祖之旨凡所作為動皆玄合太祖每言曰敬翔劉捍冠彥卿蓋為我而生其見重如此太祖有所乘馬號一丈烏嘗以賜彥卿唐天復中太祖迎昭宗于鳳翔累與岐軍對陣時彥卿為諸道馬步軍都排陣使常躬擐甲胄乘其所賜烏馬騁于陣前太祖目之曰

真神將也昭宗還京賜迎鑾毅勇功臣改邢州刺史尋遷亳州團練使太祖受禪授華州節度使

葛從周濮州鄆城人從周少豁達有智畧初入黃巢軍漸至軍校唐僖宗中和四年三月太祖大破黃巢于王藩渡從周與霍存張歸霸昆弟相率來降七月從太祖屯兵於西華破蔡賊王夏寨太祖臨陣馬踣賊衆來追甚急從周扶太祖上馬與賊軍格鬪傷面矢中于肱身被數鎗奮命以衛太祖賴張延壽回馬轉鬪從周與太

祖俱免退軍澱水諸將並削職唯擢從周延壽為大校
其後入長葛靈井大敗蔡賊至斤溝淝河殺鐵林三千
人獲九寨都虞侯王涓太祖遣郭言募兵於陝州有黃
花子賊據於溫谷從周擊破之又破秦賢之衆於滎陽
尋佐朱珍收兵於淄青間時兗州齊克讓軍於任城從
周破之擒其將呂全真淄人不受制復與之戰獲其驍
將鞏約會青州以步騎萬餘人列三寨于金嶺以扼要
害從周與朱珍戰大殲其衆虜其將楊昭範五人而還

至太原不解甲徑至板橋擊蔡賊破盧塘寨塘自溺而死又于赤岡殺蔡軍二萬餘人從討謝殷于亳州擒之迴襲曹州虜刺史丘宏禮以歸與充鄆軍遇於臨濮之劉橋間殺數萬人朱瑄朱瑾僅以身免擒都將鄒務卿以下五千人從太祖至范縣復與朱瑄戰虜尹萬榮等三人遂平濮州未幾與朱玘擊蔡賊於陳亳間獲都將石璠文德元年魏博軍亂樂從訓來告急從太祖渡河拔黎陽李固臨河等鎮至內黃破魏軍萬餘衆獲其將

周儒等十人李罕之引并人圍張全義於河陽從周與
丁會張存敬牛存節率兵赴援大破并軍殺蕃漢二萬
人解河陽之圍以功表授檢校工部尚書從朱珍討徐
州拔豐縣敗時溥於吳康得其輜重加檢校刑部尚書
佐龐師古討孫儒於淮南略地至廬壽滁等州下天長
高郵破邵伯堰迴軍攻濠州殺刺史魏勳得餉船十艘
昭宗大順元年八月并師圍潞州太祖遣從周率敢死
之士夜銜枚犯圍而入會王師不利於馬牢川即棄上

黨而歸其年十二月與丁會諸將討魏州連收十邑明年正月大破魏軍于永定橋魏軍五敗斬首萬餘級十月佐丁會攻宿州從周墜水灌其城刺史張筠以郡降從討兗州破朱瑾之軍於馬溝景福二年二月與諸將大破徐兗之兵於石佛山八月與龐師古同攻兗州乾寧元年三月軍至新太縣朱瑾令都將張約李胡椒帥三千人來拒戰師古遣從周張存敬掩襲生擒張約李胡椒等都將數十人二年十月圍兗州兗人不出從周

詐揚言并人鄆人來救即引軍趨高吳夜半潛却歸寨
朱瑾果出兵攻外壕我軍士突出掩殺千餘人生擒都
將孫漢筠從周累立戰功自懷州刺史歷曹宿二州刺
史累遷檢校左僕射三年五月并師以大軍侵魏遣其
子落落率二千騎屯洹水從周以馬步二千人擊之殺
戮大盡擒落落于陣并師號泣而去遂自洹水與龐師
古渡河擊鄆四年正月下之從周乘勝伐兗州朱瑾出
師在徐境其將康懷英以城降以功授兗州留後檢校

司空復領兵萬餘人渡淮討揚行密至濠州聞龐師古清口之敗遽班師光化元年四月率師經畧山東時并帥以大軍屯邢洺從周至鉅鹿與并軍相遇大破之并帥遁走我軍追襲至青山口數日之內邢洺磁三州連下斬首二萬級獲將吏一百五十人即以從周蕪領邢州留後十月復破并軍五千騎于張公橋晉將李嗣昭急攻邢州陣于城外從周大破之擒蕃將賁金鐵慕容騰等百餘人二年春幽州劉仁恭率軍十萬寇魏州屠

其郡從周自邢臺馳入魏州燕軍突上水關攻館陶門
從周與賀德倫率五百騎出戰謂門者曰前有敵不可
返顧令闔其門從周等極力死戰大破燕人擒都將薛
突厥王鄒郎等翊日破其八寨追擊至臨清劉仁恭走
滄州從周受宣義軍司馬五月并人討李罕之於潞州
太祖以丁會代罕之令從周馳入上黨七月并人陷澤
州太祖召從周令賀德倫守潞州德倫等尋棄城而歸
三年四月領軍討滄州先攻德州下之及進攻浮陽幽

州劉仁恭大舉來援時都監蔣玄暉謂諸將曰吳王命我護軍志存攻取今燕師來赴不可外戰當縱其入壁聚食困廩力屈糧盡可取也從周對曰兵在機機在上將非督護所言也乃令張存敬氏叔琮守其寨從周逆戰于乾寧軍老鴉堤大破燕軍斬首三萬獲將佐馬慎交已下百餘人奪馬三千匹八月并人攻邢洺從太祖破之從周追襲至青山口斬首五千級獲其將王郃郎楊師悅等得馬千匹表授檢校太保兼徐州兩使留後

尋為兗州節度使天復元年三月與氏叔琮討太原從周以充郭之衆自土門路入與諸軍會於晉陽城下以糧運不給班師頃之從周染疾會青州將劉鄩陷兗州太祖命從周討之遂力疾臨戎三年十一月鄩舉城降以功授檢校太傅後致仕

張歸霸清河人歸霸少倜儻好兵術唐僖宗乾符中寇盜蜂起歸霸率昆弟三人棄家投黃巢頗以勇畧聞巢陷長安遂署為左蕃功臣中和中巢領徒走宛丘時太

祖在汴奉詔南討巢黨日尅歸霸昆仲與葛從周李讜等相率來降尋補宣武軍劇職光啟二年與蔡將張存戰于盧氏三年夏又與蔡將盧塘戰于雙丘復與秦宗賢戰于萬勝皆敗而殲之翌日秦宗權遣將張郅來寇列寨於赤堦一日出騎將枝勝歸霸為飛弋所中即拔馬却逸控弦一發賊洞頸而墜遂兼騎而還太祖時于高丘下瞰備見其狀面加賞激厚以金帛及所獲馬錫之又嘗被命以控弦之士五百人伏于壕內太祖統數

百騎稍逼其寨蔡人果以銳士麾壘來追歸霸發伏兵掩殺千餘人奪馬數十匹尋奏授檢校左散騎常侍其後從太祖伐鄆副李唐賓渡淮咸著奇績文德初大軍臨蔡州賊將蕭顯來斫寨歸霸與徐懷玉各以所領兵自東南二扉分出合勢殺賊蔡人大敗及高祖整衆離營寇塵已息太祖召至賞之曰昔耿弇不俟光武擊張步言不以賊遺君父弇之功爾其二馬昭宗大順中郭紹賓拔曹州歸霸提兵數千守之俄而朱瑾統大軍自

至歸霸與丁會逆擊之于金鄉瑾大敗擒賊將宋江等七十餘人曹州以寧明年破濮州生擒刺史邵儒又佐葛從周與晉軍戰于洹水生擒克用愛子落落復與燕人戰於內黃殺仁恭兵三萬餘衆成績超特居諸將之右累官至檢校左僕射光化二年權知邢州事明年春李嗣昭以蕃漢五萬來寇歸霸堅壁設備晉軍不敢顧其城遂移軍攻洺州陷焉時太祖在滑頗慮邢之失守及葛從周復洺水嗣昭北遁歸霸出兵襲之殺二萬餘

衆捷至賞賜殊等旋以功奏加檢校司空天祐初遷萊
州刺史秩滿授左衛上將軍又除曹州刺史其秩加檢
校司徒副劉知俊禦邠鳳之寇敗之太祖受禪拜右龍
虎統軍

楊師厚潁川斤溝人也初為李罕之部將以猛決聞尤
善騎射及罕之敗退保澤州師厚與李鐸何綱等來降
太祖署為忠武軍牙將繼歷軍職累遷檢校右僕射表
授曹州刺史唐昭宗天復二年從太祖迎昭宗于岐下

李茂真以勁兵出戰為師厚所敗及王師範以青州叛太祖遣師厚率兵東討時淮賊王景仁以衆二萬來援師範師厚逆擊破之追至輔唐縣斬首數百級授齊州刺史將之任太祖急召見於鄆西境遣師厚率步騎屯于臨朐而聲言欲東援密川留輜重於臨朐師範果出兵來擊師厚設伏於野追擊至聖王山殺萬餘衆擒都將八十人未幾萊州刺史王師誨以兵救師範又大敗之自是師範不復敢戰師厚移軍寨於城下師範力屈

竟降三年二月加檢校司徒徐州節度使天祐元年加
諸軍行營馬步都指揮使二年八月太祖討趙凝於襄
陽命師厚統前軍以進趙凝嚴兵以備師厚至穀城西
童山刊木造浮橋引軍過漢水一戰趙凝敗散攜妻子
沿漢遁去翌日表師厚為山南東道節度留後即令南
討荊州留後趙明亦棄軍上峽不決旬併下兩鎮乃正
授襄州節度使太祖受禪加檢校太保同平章事

牛存節青州博昌人也本名禮太祖改而字之少以雄

勇自負唐僖宗乾符末鄉人諸葛爽為河陽節度使存節往從之爽卒存節謂同輩曰天下汹汹當擇英主事之以圖富貴遂歸于太祖初授宣義軍小將屬蔡冠至金堤驛犯酸棗靈昌存節日與之鬪凡二十餘往每往必執俘而還前後斬首二千餘級獲孳畜甚衆太祖擊蔡賊于板橋赤堍酸棗門封禪寺枯河北存節皆預其行與諸將於濮州南劉橋范縣大破鄆衆自此深為太祖獎遇文德元年夏李罕之以兵圍張宗奭於河陽太

祖遣存節率軍赴之屬歲歉饑餽不至村民有儲乾糶者存節以器用錢帛易之以給軍食大破賊於淇河罕之引衆北走又預討徐宿有功及討河北存節前鋒下黎陽收臨河至內黃以兵四千餘人當魏人萬二千衆大破其陣僵仆蔽野太祖深所歎激謂有神兵之助昭宗大順元年改滑州左右廂牢城使諸將討時溥累破賊軍景福元年秋改過後都指揮使攻濮之役領軍先登遂拔其壘二年四月下徐州梟時溥存節力戰其功

居多乾寧三年夏太祖東討鄆州存節領軍次故樂亭
扼其要路都指揮使龐師古屯馬頰存節密與都將王
言謀入鄆壘十二月存節遣王言夜伏勇士於州西北
以船踰濠舉梯登陴既而王言不克入存節獨率伏軍
負梯輜破其西壘城奪其濠橋諸軍俱進四年正月陷
其城尋與葛從周降下兗州其年秋大舉以伐淮南至
濠州東聞前軍失利于青口諸軍退至泲河無復隊伍
存節過其後與諸將大騎步鬪諸軍稍得濟收合所部

并敗兵共八千餘人至于淮涑時不食已四日矣存節
訓勵部分以禦追寇遂得旋師五年除濠州刺史俄遷
宣武軍都指揮使改宿州刺史明年淮賊大至彭城存
節乃以部下兵夜發直趨彭門淮人訝其神速震恐而
退諸將服其智識光化二年罷歸復為左衛都將兼馬
步教練使天復元年授潞州馬步都指揮使法令之整
士庶安之及追赴行在士卒泣送者不絕於道加金紫
光祿大夫檢校司空改滑州左衛步軍指揮使知邢州

軍州事天祐元年授邢州團練使時州兵未及二百人
晉人知之以大軍來寇太祖在鄴發長直兵二千人赴
援存節率壯健出門以家財賞激戰士并軍急攻之七
日不能克而去太祖召至勞慰久之厚賚金帛鞍馬冬
罷郡署為元帥府左都押牙四年太祖受禪除右千牛
衛上將軍

王彥章鄆州壽張縣人也彥章少從軍隸太祖帳下以
虜勇聞稍遷軍職累典禁兵從太祖征討所至有功嘗

持鐵槍衝堅陷陣敵人畏之目之為王鐵槍開平二年十月自開封府押牙左親從指揮使授左龍天軍使三年轉左監門衛上將軍依前左龍驤軍使

徐懷玉本名琮亳州雋夷縣人少以雄傑自任隨太祖起軍唐僖宗中和末從赴大梁光啟初蔡冠屯金堤驛懷玉將輕騎連破之繇是累遷親從副將改左長劍都虞侯又從破蔡賊於板橋收秦宗權八寨文德初同諸將解河陽之圍復從破徐宿乾寧中太祖賜名懷玉又

破朱瑾於金鄉南擒宋江以獻龐師古失利于清口懷
玉獨完軍以退光化初轉滑州右都押牙兼右步軍指
揮使俄奏授沂州刺史頃之王師範以青州叛屢出兵
侵軼懷玉擊退之天復三年轉齊州防禦使從大軍迎
駕于岐下歸署華州觀察留後一年復領所部兵戍雍
州尋召赴河中補晉絳同華五州馬步都指揮使天祐
三年授左羽林統軍轉右龍虎統軍領六軍之士赴澤
州尋為晉軍所攻晝夜衝擊穴地而入之玉率親兵逆

殺於隧中晉人遂退開平元年授曹州刺史

劉捍開封人少為牙職太祖初鎮夷門以捍聰敏擢副
典客唐僖宗中和四年夏太祖以朱玘為淄州刺史令
收兵於淄青間命捍監其兵路逢大敵皆破之入博昌
獲精兵三萬以歸四月合大軍敗蔡賊秦宗賢數萬衆
於汴西文德元年十一月蔡將申叢折宗權足納款于
太祖使捍奏其事加兼察御史大夫光化三年六月太
祖北伐鎮定至恒山而王鎔危懼送款於太祖命捍入

壁門傳諭時兩軍未整守門者戈戟千匝捍馳騎而入
竟達其命又移師次中山至懷德驛大破定人五萬衆
王處直乞降捍復單馬入州安撫而迴太祖迎昭宗於
岐下以捍為親事指揮使天復三年正旦宋文通令客
將郭啟竒使於太祖命捍復命昭宗聞其至即召見詢
東兵之事仍以錦服銀鞍勒馬賜之翌日授登州刺史
昭宗還京改常州刺史賜號迎鑾毅勇功臣四月太祖
伐王師範於青州改左右長直都指揮使天祐三年正

月授宋州刺史太祖受禪授左龍虎統軍兼元從親軍
馬步都虞侯

朱玘徐州豐縣雍鳳里人也太祖初起兵玘與龐師古
許唐李暉丁會氏叔琮鄧季筠王武等八十餘人以中
涓從權堅陷陣所向盪決及太祖鎮汴領招討使署玘
為宣武右職唐僖宗光啟元年署諸軍都指揮使始為
上將太祖令玘募兵至乾封與淄人戰于白草口敗之
青人以步騎三萬列三寨於金嶺驛玘與戰連破之殲

其帥盡獲軍器戎馬是夕攻博昌大獲兵衆而還其後
破盧塘張郅及朱琮朱瑾之衆平定曹濮未嘗不在戰
中梁山之救玠以踏白騎士入陳亳間以邀蔡人遂南
至斤溝破淮西石璠之師三萬人虜璠以獻玠旋師自
亳北趣靜戎濟舟于滑破黎陽臨河李固三鎮軍于內
黃敗樂從訓萬餘人分命聶金范居實畧澶州與魏師
遇于內黃魏軍有豹子軍二千人戮之無噍類威振河
朔復攻淮西至上蔡夾河而寨敗將蕭皓之衆皆擁于

河溺死之進軍蔡州營其西既破羊馬垣遇雨班師珍以兵援劉贊赴楚州至襄山南遇徐戎扼其路珍乃攻豐下之時溥乃以全師會戰于豐南吳康里珍敗其三萬餘衆及蔡賊平珍比諸將功居多昭宗龍紀初與諸將屯於蕭縣以禦時溥及太祖往蕭縣珍率將校迎謁氏叔琮尉氏人唐末應募為騎軍初隸于龐師古為伍長叔琮壯勇沉毅膽力過人太祖討巢蔡于陳許間叔琮奮擊首出諸校太祖壯之自行伍間擢為後院馬軍

都將時東伐徐鄆多歷年所叔琮身當矢石奮不顧命
觀者許焉累遷為指揮使尋奏授宿州刺史檢校左僕
射

鄧季筠宋州下邑人也少入巢軍隸于太祖麾下及太
祖鎮汴首署為牙將主騎軍伐鄆之役生擒排陣將劉
矯以獻

康懷英兗州人太祖素聞其名得之甚喜尋署為軍校
唐昭宗光化元年秋從氏叔琮伐襄漢懷英以一軍攻

下鄧州三年從征河朔佐張存敬敗燕軍于易水之上
天復元年冬太祖率師迎昭宗于鳳翔時李茂真遣大
將符道昭領兵萬餘屯武功以拒太祖太祖命諸將擊
之以懷英為前鋒領衆先登一鼓而大破之虜甲士六
千餘人奪馬二千匹翌日太祖方至顧左右曰邑名武
功今首盜逆黨真武功也乃召懷英大加獎激仍以駿
馬珍器賜之二年四月符道昭復領大軍屯於虢縣之
莫谷其建寨之所前臨巨澗後倚峻阜險不可升太祖

遣懷英提騎數千急擊之道昭以懷英兵寡有俯視之意乃率甲士萬人絕澗以挑戰懷英始以千騎交鬪戰酣發伏以擊之岐軍大敗秋八月鄜帥李周彝屯軍於三原以援鳳翔太祖命懷英討之周彝拔軍而遁追至黎園因攻下翟州擒其守來獻俄而岐軍屯奉天太祖令懷英寨于岐軍之東北以備敵人一夕岐軍大至急攻其營懷英以夜中不可驚動諸軍獨以二千餘人抗數萬之衆自乙夜至四鼓身被十餘槍岐軍不勝而退

昭宗還京賜迎鑿毅勇功臣是歲淮人聞青兗之叛遣兵數萬以寇宿州太祖命懷英馳騎以救之淮人遁去即以懷英為權知宿州刺史天祐三年冬佐劉知俊破邠鳳之衆五萬于美原收十五餘寨乘勝引軍攻下郿州以功授陝州節度使太祖受禪加檢校太保

郭言太原人也家於南陽新野少以力穡養親鄉里稱之唐僖宗廣明中黃巢擁衆西犯秦雍言為巢黨所執後從太祖赴汴初為騎軍繼有戰功後擢為裨校言性

剛直有權畧勤于戎事或以家財分給將士之貧者繇是頗得士心屢將兵與蔡冠戰于浚郊每以少擊衆出必勝歸太祖嘉其勇果謂賓佐曰言乃吾之虎侯也時秦宗權支黨數十萬太祖兵不過數千每恨其寡與之不敵一日命言董數千人越河雒趨陝虢招召丁壯以實部伍言夏往冬旋得銳士萬餘遂遷步軍都將自是隨太祖掩襲蔡冠斬獲掠奪不可勝計宗權以茲敗北太祖盡收其地因命言將兵導達貢奉以安郵傳自汴

鄭迄於潼關去奸恤弱甚得其所光啟中僖宗以太祖
兵威日振命兼領揚州節度使太祖遣幕吏李璠領兵
赴淮揚以制置為名時言為李璠前鋒深入淮甸破盱
眙而還梁祖東伐徐鄆言將偏師畧地千里頻逢寇敵
言出奇決戰所向皆捷大挫東人之銳太祖錄其績以
排陣斬斫之號委之尋表為宿州刺史檢校右僕射于
時徐宿兵鋒日夕相接控扼偵邏以言為首

劉康又壽昌安封縣人也以農桑為業唐僖宗乾符中

關東羣盜並起江淮間徧懼其酷因為巢黨所掠康又
沈默有膂力善用矛槩然不樂為暴中和三年從太祖
赴鎮委以心腹康又枕戈擐甲夷險無憚其後累典親
軍襲巢破蔡斬獲尤多累以戰功遷元從都將從太祖
連年攻討徐兗鄆所向多捷尤善於營壘充諸軍壕寨
使及太祖盡下三鎮議其功奏加檢校右僕射兼領軍
衛

范居實絳州翼城人事太祖初為隊將軍從討巢蔡有

功又從朱玘收滑州改左廂都虞侯預破兗鄆功遷感
義都頭鄭州馬軍指揮使幽州劉仁恭舉衆南下寇魏
郡北閩居實與葛從周張存敬率兵救魏大破幽滄之
衆於內黃太祖迎昭宗於岐下以居實為河中馬軍都
指揮使及昭宗還京賜迎鑾殺勇功臣遙領錦州刺史
又遷左龍驤馬軍都指揮使從征淮南迴改登州刺史
轉左神勇軍使開平元年用軍於潞州命居實統軍以
解州之圍授耀州刺史令以郡兵屯固鎮尋除澤州刺

史居實拳勇善戰頗立軍功



冊府元龜卷三百四十六

欽定四庫全書

子部

冊府元龜卷三百四十七至九

詳校官中書臣羅錦森

侍讀臣孫球覆勘

總校官庶吉士臣何思鈞

校對官典簿臣劉景岳

謄錄監生臣沈毓鳳

欽定四庫全書

冊府元龜卷三百四十七

宋

王欽若等

撰

將帥部

佐命第八

後唐李嗣昭武皇母弟代州刺史克柔之假子也小字
進通不知族姓所出少從征伐精練軍機唐昭宗乾寧
四年為內衙都將援河中敗汴軍於胡壁堡擒汴將滑
禮及王珂請婚於武皇武皇以女妻之珂赴禮會於太

原以嗣昭權典河中留事李罕之襲我潞州也嗣昭率師攻潞與汴將丁會戰于含口俘獲三千執其將蔡延恭代李君慶為蕃漢馬步行營都將進攻潞州遣李存質李嗣本以兵扼天井關汴將澤州刺史劉玘棄城而遁乃以李存璋為刺史梁祖聞嗣昭之師大至召葛從周謂曰并人若在高平當圍而取之先須野戰勿以潞州為敵及聞嗣昭軍韓店梁祖曰進通扼八議路此賊決與我關公等臨事制機勿落奸便賀德倫閉壁不出

嗣昭日以鐵騎環城汴人不敢芻牧援路斷絕八月德倫張歸厚棄城遁去遂復取潞州三年汴人攻滄州劉仁恭求救遣嗣昭出師邢洺以應之嗣昭遇汴軍於沙河擊敗之獲其將胡禮進攻洺州下之獲其郡將朱紹宗九月梁祖自率軍三萬至臨洺葛從周設伏於青山口嗣聞梁祖至斂軍而退從周伏兵發為其所敗偏將王郃郎揚師悅等被擒十月汴人大寇鎮定王郃告急於武皇乃遣嗣昭出師下太行擊懷孟汴將侯言守河

陽不意嗣昭之師至既無守備驅市人登城嗣昭攻其北門破其外垣俄而汴將閻寶救軍至乃退天復元年河中王珂為汴軍所虜河中晉絳諸郡皆陷四月汾州刺史李瑋謀叛納款於汴嗣昭討之三日而拔斬瑋是月汴人初得蒲絳乃大舉諸道之師來逼太原汴將葛從周陷承天軍氏叔琮營洞渦驛太原四面汴軍雲合武皇憂迫計無從出嗣昭朝夕選精騎分出諸門掩擊汴營左將右斬或燔或擊汴軍疲於奔命又屬霖雨軍

多腫痢糧運不繼五月氏叔琮引退嗣昭以精騎追之
汴軍乃棄輜重兵仗萬計六月嗣昭出師陰地攻慈隰
降其刺史唐禮張瓌是時天子在鳳翔汴人攻圍有密
詔徵兵十一月嗣昭出師晉絳屯吉上堡與汴將王反
遇於平陽一戰擒之明年正月嗣昭進營蒲縣十八日
汴將朱友寧氏叔琮將兵十萬來拒二十八日梁祖自
率大軍至平陽嗣昭之衆大恐三月十一日有白虹貫
周德威之營候者云不利宜班師翌日氏叔琮犯德威

之營汴軍十餘萬列陳四合德威嗣昭血戰解之乃保軍而退汴軍因乘之時諸將潰散無復部伍德威引騎軍循西山而遁朱友寧乘勝陷慈隰汾等州武皇聞其敗也遣李存信率牙兵至清源應接復為汴軍所擊汴軍營於晉祠嗣昭德威收合餘衆登城拒守汴人治攻具於西北隅四面營柵相望時鎮定河中皆為梁有孤城無援師旅敗亡武皇晝夜登城憂不遑食召諸將謀欲出保雲州嗣昭曰王勿為此謀兒等苟存必能城守

李存信曰事勢危急不如且入北蕃別圖進取朱溫兵師百萬天下無敵關東河北受他指揮今獨守危城兵亡地蹙儻彼築室反耕環塹深固則亡無日矣武皇將從之嗣昭亟爭不可猶豫未決賴劉太妃極言於內武皇且止數日亡散之衆復集嗣昭晝夜分兵四出斬將奪旗汴軍保守不暇二十一日朱友寧燒營退去嗣昭追擊復收汾慈隰等州五月雲州都將王敬暉據城叛振武石善友亦為部將契苾讓所逐嗣昭皆討平之天

祐三年汴人攻滄景劉仁恭遣使求援十一月嗣昭為
昭義節度使五年五月莊宗敗汴軍破夾城嗣昭知武
皇棄世哀慟幾絕時大兵攻圍歷年城中士民饑死大
半塵里蕭條嗣昭緩法寬租勸農務穡一二年間軍城
完集三面隣於敵境寇鈔縱橫設法枝梧邊鄙不聳胡
柳之戰周德威戰沒師無行列至晚方集汴人四五萬
登無石山莊宗之軍懼形於色或請收軍保營詰旦復
戰嗣昭曰賊無營壘去臨濮地遠日已晡晚皆有歸心

但以精騎撓之無令返旆晡後追擊破之必矣我若收
軍拔寨賊入臨濮俟彼整齊復來即勝負未決莊宗曰
非兒言幾敗吾事軍校王建及又陳方畧嗣昭與建及
分兵於土山南北為犄角汴軍懼下山因縱軍擊之俘
斬三萬級繇是莊宗帳餞於戚城莊宗酒酣泣而言曰
河朔生靈十年饋輓引領鶴望候破汴軍今兵賦不充
寇孽猶在坐食軍賦有愧蒸民嗣昭曰臣忝急難之地
每一念此寢不安席大王且持重謹守惠養士民臣歸

本藩簡料兵賦歲末春首即舉衆復來莊宗離席拜送如家人禮是月汴將劉鄩攻同州朱友諒告急嗣昭與李存審援之九月破汴軍於馮翊乃班師十九年莊宗親征張文禮於鎮州冬契丹三十萬奄至嗣昭從莊宗擊虜於新城阿保機在望都莊宗深入親與虜鬪虜騎圍之數十重良久不解嗣昭號泣赴之引三百騎橫擊虜圍突出沒者數十合虜退翼莊宗而還是時閻寶為鎮人所敗退保趙州莊宗命嗣昭代寶攻真定七月

二十四日王處球之兵出至九門嗣昭設伏於故營賊至發伏擊之殆盡餘三人匿於牆墟間嗣昭環馬而射之為賊矢中腦嗣昭箛中矢盡拔賊矢於腦射賊一發而殪之嗣昭日暮還營所傷流血不止是夜卒莊宗即位贈太師隴西郡王長興中詔配饗莊宗廟庭

李嗣本本姓張少事武皇為帳中紀綱漸立戰功得補軍校唐昭宗乾寧初從征李儔為前鋒與燕人戰得居庸關以功為義兒軍使因賜姓名從討王行瑜授檢校

刑部尚書改威遠寧塞等軍使五年討羅弘信於魏州
嗣本為前鋒師還改馬軍都將從李嗣昭討王暉於雲
州論功加檢校司空汴將李思安之圍潞州也從周德
威軍餘吾嗣本率騎軍日與汴人轉鬪前後獻俘千計
遷代州刺史六年從攻晉絳為蕃漢副都校後為振武
節度使莊宗定魏博劉鄩據葦縣命嗣本入太原巡守
都城又從破劉鄩於故元城收洺磁衛等三郡乃還鎮
振武

李嗣恩本姓駱年十五能騎射侍武皇於振武及鎮太原補鐵林軍小校從征王行瑜奉表獻捷加檢校散騎常侍漸轉突陣指揮使賜姓名天祐四年遂康懷英於西河解汾州之圍加檢校司空充左廂馬軍都將戰王景仁有功加檢校司徒天祐十二年從莊宗入魏擊劉鄩有功轉天雄軍馬步軍都指揮使劉鄩之北趨樂平也嗣恩襲之倍程先入晉陽時城中無備得嗣恩兵至人百其勇鄩聞其先過乃遁莘之戰以功轉代州刺史

充石嶺關已北都知兵馬使稍遷振武節度使十五年
追赴行在卒於太原

李存信本姓張從武皇入關平賊始補軍職為蕃漢都
校從討李儁降赫連鐸白義誠以功加檢校左僕射從
入關討王行瑜加檢校司空領柳州刺史

李存孝給事武皇帳中常將騎為先鋒從武皇救陳許
逐黃寇及遇難上源每戰無不克捷後收潞之師圍張
濬於平陽營於趙城華州韓建遣壯士三百夜犯其營

存孝謀知設伏以擊之盡殪進壓晉州西門獲賊三千
自是閉壁不出存孝引軍攻絳州其刺史張行恭棄城
而去張濟韓建亦繇合口而遁存孝收晉絳以功授汾
州刺史

李存進振武人事武皇從入關還鎮太原署牙職從討
王行瑜以功授檢校常侍與李嗣昭同破王珙於河中
唐昭宗光化三年契丹犯塞寇雲中改永安軍使鴈門
已北都知兵馬使天復初破氏叔琮前軍於洞渦三年

授石州刺史莊宗初嗣位入為步軍右都校檢校司空
師出井陘授行營馬步都虞侯破汴軍於栢鄉論功授
汾州刺史轉檢校司徒俄兼西南面行營招討使出師
收慈州授慈沁二州刺史

李存璋雲中人武皇初起雲中存璋與康君立薛志勤
等為奔走之交從入關以功授國子祭酒累管萬勝雄
威等軍從討李儔改義兒軍使唐昭宗光化二年授澤
州刺史入為牢城使從李嗣昭討雲州叛將王暉平之

改教練使五年武皇疾篤名張承業與存璋授遺詔存璋爰立莊宗夷內難頗有力馬改河東馬步都虞侯從破汴軍於夾城轉檢校司徒栢鄉之役為三鎮排陣使十一年從盟朱友謙于猗氏授汾州刺史汴將尹皓攻慈州逆戰敗之十三年王檀逼太原存璋率汾州之軍入城固守授大同軍防禦使應蔚朔等州都知兵馬使秋契丹寇蔚州陷之阿保機遣使馳木書求賂存璋斬其使虜逼雲州存璋拒守城中有古鐵車乃鎔為兵仗

以給軍事虜退以功授檢校太傅大同節度雲應等州
觀察

康君立蔚州興唐人世為邊豪唐僖宗乾符中為雲州
牙校事防禦使段文楚時羣盜起河南天下將亂代北
仍歲阻饑諸部豪傑咸有嘯聚邀功之志會文楚稍削
軍人儲給戍兵咨怨君立與薛鐵山程懷信王行審李
存璋等謀曰段公儒人難與共事方今四方雲擾皇威
不振丈夫不能於此時立功立事非人豪也吾等雖權

部衆然以雄勁聞於時者莫若沙陔部復又李振武父子勇冠諸軍吾等合勢推之則代北之地旬月可定功名富貴事無不濟也君立等乃夜謁武皇言曰方今天下大亂天子付將臣以邊事歲偶饑荒便削儲給我等邊人馬能守死公家父子素以威惠及五部當共除虐帥以謝邊人孰敢異議者武皇曰明天子在上舉事當有朝典公等勿輕議子家尊遠在振武萬一相迫俟子稟命君立等曰事機已泄遲則變生曷俟千里咨稟衆

因聚謀擁武皇比及雲州衆且萬人師營關雞臺城中械文楚以應武皇之軍既收城推武皇為大同軍防禦留後衆狀以聞朝廷不悅詔徵兵來討俄而獻祖失振武武皇失雲州朝廷命招討使李鈞幽州李舉加兵於武皇攻武皇於蔚州君立從擊鈞舉之師屢敗及獻祖入韃靼君立保感義軍武皇授鴈門節度以君立為左都押牙從入關逐黃孽收長安武皇還鎮太原授檢校工部尚書先鋒軍使文德初李罕之既失河陽來歸於

武皇且求援焉乃以君立充南面招討使李存孝副之
帥師二萬助罕之攻取河陽三月與汴將丁會牛存節
戰於沈河臨戰之次騎將安休休叛入汴軍君立引退
八月授汾州刺史昭宗大順元年潞州小校安居受反
武皇遣君立討平之授檢校左僕射昭義節度使

薛志勤蔚州奉誠人小字鐵山初為獻祖帳中親信唐
僖宗乾符中與康君立共推武皇定雲中以功授右牙
都校從入鞬武皇授節鴈門志勤領代北軍使從入

關收京城以功檢校工部尚書河東右都押牙先鋒右
軍使從武皇救陳平黃巢武皇遇難於上源驛汴將楊
彥洪連車樹柵遮絕巷陌時騎從皆醉宴席既闌汴軍
四面攻傳舍志勤號勇冠絕復酒膽激壯因獨登驛樓
大呼曰朱僕射負恩無行邀我司空圖之吾三百人足
以濟事因彎弧發射矢無虛發汴人斃者數十志勤私
謂武皇曰事急矣如至五鼓吾屬無類矣可速行因扶
武皇而去雷雨暴猛汴人扼橋志勤以其屬血戰擊敗

之得侍武皇還營繇是恩顧益厚昭宗大順初張濬以
天子之師來侵太原十月天軍入陰地志勤與李承嗣
率騎三千抗之敗韓建之軍於蒙坑進收晉絳以功授
忻州刺史二年從討鎮州收天長臨城志勤皆先登陷
陣勇敢無前王暉據雲州叛討平之以志勤為大同軍
防禦使檢校司空乾寧初代康君立為昭義節度使

李承嗣代州鴈門人承嗣少仕郡補右職唐僖宗中和
二年從武皇討賊闖輔為前鋒王師之攻華陰黃巢令

偽客省使王汀會軍機於黃揆承嗣擒之以獻賊平以
功授汾州司馬改榆次鎮將光啓初從討蔡賊于陳許
上源之難遣承嗣奉表行在陳訴其事觀軍容田令孜
館而慰譬令達情於武皇姑務協和仍授以左散騎常
侍朱玫之亂遣承嗣率軍萬人援鄜州至渭橋迎扈車
駕王行瑜既殺朱玫承嗣會鄜夏之師入定京城獲偽
相裴徹鄭昌圖函送朱玫襄王首獻于行在駕還宮賜
號迎鑿功臣檢校工部尚書守嵐州刺史賜犒軍錢二

萬貫時車駕初還三輔多盜承嗣按兵警邏輦轂又安
及還屯於鄜留別將馬嘉福五百騎宿衛孟方立之襲
遼州也武皇遣承嗣設伏於榆社以待之邢人既至承
嗣發伏擊其歸兵大敗之獲其將奚忠信以功授洺州
刺史及張濟之加兵於太原也時鳳翔軍營霍邑承嗣
帥一軍攻之岐人夜遁追擊至趙城合大軍攻平陽旬
有三日而拔師旋改教練使檢校司徒昭宗乾寧二年
兗鄆為汴人所攻勢漸危蹙遣使乞師於武皇武皇遣

承嗣帥三千騎假道於魏度河援之時李存信屯于莘縣既而羅弘信背盟掩擊王師因茲隔絕及朱瑄朱瑾失守承嗣朱瑾史儼同入淮南承嗣史儼皆驍將也淮人得之軍聲大振武皇深惜之如失左右手乃遣趙岳間道使于淮南請歸承嗣等楊行密許之遣使陳令存修好于武皇其年九月汴將龐師古葛從周出師將收淮南朱瑾率淮軍三萬與承嗣設伏於清口大敗汴人生獲龐師古行密嘉其雄才留而不遣仍奏授檢校太

尉領鎮江軍節度使

史儼代州鴈門人以便騎射給事於武皇為帳中親將
驍果絕衆善擒生設伏望塵揣敵所向皆捷自武皇入
定三輔誅黃巢每出師皆從唐昭宗乾寧中從討王行
瑜師次渭北遣儼率五百騎護駕石門時京城大擾士
庶奔迸散布南山儼分騎警衛比駕還京盜賊不作以
功授檢校右散騎常侍屯三橋者累月

史建塘鴈門人武皇節制鴈門建塘為九府都督從入

關定京師及鎮太原為裨將唐僖宗中和四年從援陳許為前鋒敗黃巢於汴上追賊至徐充常將騎挺身酣戰勇冠諸軍是時天下之師雲集軍中無不推伏

蓋寓蔚州人祖祚父慶世為州之牙校武皇起雲中寓與康君立等推轂佐佑之因為腹心武皇節制鴈門署職為都押牙領嵐州刺史洎移鎮太原改左都押牙檢校左僕射武皇與之決事言無不從凡出征行靡不衛從唐昭宗乾寧二年從入關討王行瑜特授檢校太保

開國侯邑千戶領容管觀察經畧使光化初車駕還京
授檢校太傅封成陽郡公寓性通黠多智數善揣人主
情武皇性嚴急左右難事無委遇者小有違忤即寘於
法唯寓承顏希旨規其趣向婉辭順意以盡參禪武皇
或暴怒將吏事將不測寓欲救止必佯佐其怒以責之
武皇怡然釋之有所諫諍必徵近事以為喻自武皇鎮
撫太原最推親信中外將吏無不景附朝廷藩隣信使
結託先及武皇次入寓門既總軍中大柄其名震主梁

祖亦使姦人離間暴揚於天下言蓋寓已代李克用聞者寒心武皇畧無疑間初武皇既平王行瑜旋師渭北暴雨六十日諸將或請入覲且云天顏咫尺安得不行覲禮武皇意未決寓白曰車駕自石門還京寢未安席比為行瑜兄弟驚駭乘輿今京師未寧姦宄流議大王移兵渡渭必恐復動宸情君臣始終不在朝覲但歸藩守姑務勤王是忠之道也武皇笑曰蓋寓尚阻吾入覲况下人哉即日班師

周德威小字揚五朔州馬邑人也初事武皇為帳中騎
督唐昭宗乾寧中為鐵林軍使從武皇討王行瑜以功
授檢校左僕射移內衙軍副天復中武皇之師不利於
蒲縣汴將朱友寧氏叔琮來逼晉陽時諸軍未集城中
大恐德威與李嗣昭選募銳兵分出諸門以攻其壘擒
生斬馘汴人枝梧不暇乃退天祐三年與李嗣昭合燕
軍攻潞州降丁會後為蕃漢都將李思安之寇潞也德
威軍於餘吾時汴人十萬築夾城圍潞州內外斷絕德

威以精騎薄之屢敗汴人進營高河令遊騎邀其芻牧
汴軍閉壁不出乃自東南山口築埽道樹柵以通夾城
德威之騎軍倒牆堙塹日數十戰首後俘馘不可勝紀
梁有驍將黃角鷹房骨崙皆生致之五年四月命德威
班師時莊宗初立德威外握兵柄頗有浮議內外憂之
德威既至單騎入謁繇是羣情釋然是月二十四日從
莊宗再援潞州二十九日德威前軍營橫碾距潞四十
五里五月朔晨霧晦暝王師伏於三垂岡下翌日直趨

夾城斬關破壘梁人大敗解潞州之圍初德威與李嗣
昭有私憾武皇臨終顧謂莊宗曰進通忠孝不負我重
圍累年似與德威有隙以吾命諭之若不解重圍歿有
遺恨莊宗達遺旨德威感泣繇是勵力堅戰竟破彊敵
與嗣昭歡愛如初以功加同平章事振武節度使七年
岐人攻靈夏遣使來求助德威渡河以應之師還授蕃
漢馬步總管十一月汴人據深冀汴將王景仁軍八萬
次柘鄉鎮州節度使王鎔來告難帝遣德威率前軍出

井陘屯於趙州十二月帝親征二十五日進薄汴營距
栢鄉五里營於野河北汴將韓勅率精兵三萬鎧甲皆
被繒綺金銀炫曜望之森然我軍懼形於色德威謂李
存璋曰賊結陣而來觀其形勢志不在戰欲以兵甲耀
威耳我軍人乍見其來謂其鋒不可當此時不挫其銳
吾軍不振矣乃遣存璋諭諸軍曰爾見此賊軍否是汴
州天武健兒皆屠沽傭販虛有其表徒被精甲十不當
一擒獲足以為貨德威自率精騎擊其兩偏左馳右決

出沒數四是日獲賊一百餘人賊渡河而退德威謂莊宗曰賊驕氣尤盛宜按兵以待其衰莊宗曰我提孤軍救難解紛三鎮烏合之衆利在速戰卿欲持重吾懼其不可使也德威曰鎮定之士長於守城列陣野戰素非便習我師破賊惟恃騎軍平田廣野易為施巧今壓賊營令彼見我虛實則勝負未可必也莊宗不悅退卧帳中德威患之謂監軍張承業曰王欲速戰將烏合之徒欲當劇賊所謂不量力也去賊咫尺限此一渠水彼若

早夜以略約渡之吾族其為俘矣若退軍部邑引賊離營彼出則歸彼歸則出復以輕騎掠其芻餉不踰月敗賊必矣承業入言莊宗亦釋然德威得降人問之曰景仁下令造浮橋數百果如德威所料二十七日乃退軍保部邑八年正月二日德威率騎軍致師於栢鄉設伏於村塢間令三百騎以壓汴營王景仁悉其衆結陣而來德威轉戰而退汴軍因而乘之至於部邑南時步軍未成列德威陳騎河上以抗之亭午兩軍皆陣莊宗問

戰時德威曰汴軍氣盛可以逸制勞造火較力殆難與敵古者師行不踰一舍蓋慮糧餉不給士有饑色今賊遠來決戰縱挾糗糒亦不遑食晡晚之後饑渴內侵戰陣外迫士心既倦將必求退乘其勞弊以生兵制之縱不大敗偏師必喪以臣所籌利在晡晚諸將皆然之時汴軍以魏博之人為右廣宋汴之人為左廣自未至申陣勢稍却德威麾軍呼曰汴軍走矣塵埃漲天魏人收軍漸退莊宗與史建瑭安金全等因衝其陣夾攻之大

敗汴軍殺戮殆盡王景仁李思安僅以身免獲將較二百八十人八月劉守光僭稱大燕皇帝十二月遣德威率步騎三萬出飛狐與鎮州將王德明定州將程嚴等軍進討九年正月收涿州降刺史劉知溫五月七日劉守光令驍將單廷珪督精甲萬人出戰德威遇於龍頭岡初廷珪謂左右曰今日擒周揚五既臨陣見德威廷珪單騎持槍窮追德威垂及德威側身避之廷珪少退德威奮搥擊墜其馬生獲廷珪賊黨大敗斬獲三千級

獲大將李山海等五十二人十二日德威自涿州進軍
良鄉大城守光既失廷珪自是奪氣德威之師屢收諸
郡降者相繼十年十一月擒守光父子幽州平十二月
授德威檢校侍中幽州盧龍等軍節度使德威性忠孝
感武皇獎遇嘗思臨難亡身十二月汴將劉鄩自洹水
乘虛將寇太原德威在幽州聞之徑以五百騎馳入土
門聞鄩軍至樂平不進德威徑至南宮以候汴軍初劉
鄩欲據臨清以扼鎮定轉餉之路行次陳宋口德威遣

將擒數十人皆俾刃於背繫而遣之既至謂劉鄩曰周侍中已據宗城矣德威其夜急騎扼臨清劉鄩乃入貝州是時德威若不至則勝負未可知也十五年我師營麻口渡將大舉以定汴州德威自幽州率本軍至十二月二十三日軍次胡柳詰旦騎報曰汴軍至矣莊宗使問戰備德威奏曰賊倍道而來未成行伍我營柵已固守備有餘既深入賊疆須決萬全之策此去大梁信宿賊之家屬盡在其間人之常情孰不以家國為念以我

深入之衆抗彼激憤之軍不以方畧制之恐難必勝王
但按軍保柵臣以騎軍疲之使彼不得下營際晚糧爨
不給進退無據因而乘之勝之道也莊宗曰河上終日
挑戰恨不遇賊今款門不戰非壯夫也乃率親軍成列
而出德威不獲已從之謂其子曰吾不知其死所矣莊
宗與汴將王彥章接戰大敗之德威之軍在東偏汴之
遊軍入我輜重衆駭奔入德威軍因紛擾無行列德威
兵少不能解父子俱戰歿是夜收軍德威不至莊宗慟

哭謂諸將曰喪吾良將吾之咎也同光初追贈太師

符存審陳州宛邱人初歸武皇署右職令典義兒軍賜
姓李存審性謹厚寵遇日隆自是武皇四征存審常從
所至立功改左右廂步軍都指揮使天祐三年授蕃漢
馬步副指揮使與李嗣昭降丁會於上黨從周德威破
賊於夾城以功授忻州刺史領蕃漢馬步都指揮使七
年充漢副總管莊宗擊汴人於柘鄉留存審守太原九
年梁祖攻菑縣存審與史建塘李嗣昭赴援屯下博橋

汴人驚亂燒營而遁以功遙領邢洺磁團練使十二年
魏博歸款於莊宗莊宗遣存審率前鋒據臨清以俟進
取莊宗入魏存審屯魏縣以抗劉鄩十二年六月鄩營
莘縣存審與鎮定之師營莘西三十里一日數戰八月
率師攻張源德於貝州十三年二月劉鄩自莘悉衆來
襲我魏州存審以大軍踵其後戰於故元城大敗汴人
從收澶衛磁洺等州秋邢州閻寶降授存審安國軍節
度使邢洺磁等州觀察使十月戴思遠棄滄州毛璋以

城降授存審橫海軍節度使兼領魏博馬步軍都指揮使明年就加平章事十四年八月將兵援周德威於幽州敗契丹之衆冬破汴將安彥之於揚劉諸軍進營麻口時梁將謝彥章營行臺村莊宗勇於接戰每以輕騎當之遇窘者數四存審每俟其出必叩馬泣諫曰王將復唐宗社宜為天下自愛寡於挑戰一劍之任無益聖德請責效於臣古人不以賊遺君父臣雖不武敢不代君之憂莊宗即時迴駕十二月戰於胡柳晡時之後存

審引所部銀槍效節軍敗梁軍於土山下是日辰巳間
周德威歿一軍逗曉梁軍四集存審與其子彥圖冒刃
血戰出沒賊陣與莊宗軍合午後師復集擊敗汴人十
六年春為內外蕃漢馬步總管於德勝口築南北城以
據之七月汴將王瓚自黎陽渡河寇澶州存審拒戰瓚
退營於楊村渡控我上游自是日與交鋒對壘經年大
小凡百餘戰十七年汴將劉鄩攻同州朱友謙求援於
我遣存審與李嗣昭將兵赴之九月次河中進營朝邑

時河中久臣於梁衷持兩端及諸軍大集芻粟暴貴嗣昭懼其反覆將急戰以定勝負居旬日梁軍逼我營會望氣者言西南有黑氣如闖難之狀當有戰陣存審曰我方欲決戰而形於氣象得非天贊歟是夜閱其衆詰旦進軍梁軍來逆戰大敗之追斬二千餘級自是梁軍保壘不出存審謂嗣昭曰吾初懼劉鄩據渭河偏師既敗彼若退歸懼我踵之獸窮持人勿謂無事可開其歸路然後追奔乃令王建及牧馬於沙苑劉鄩尹皓知之

保衆退去遂解同州之圍存審略地至奉先謁諸帝陵
乃班師十八年王師討張文禮於鎮州李嗣昭李存進
相次戰歿十九年遣存審率師進攻師於城下文禮之
將李再豐陰送款於存審我師中夜登城擒文禮之子
處球等露布以獻鎮州平以功加檢校太傅兼侍中二
十年正月師旋於魏州莊宗出城迎勞就第宴樂居無
何契丹犯燕薊郭崇韜奏曰汴寇未平李繼韜背叛北
邊遮虜非存審不可帝遣中使諭之存審卧病羸瘠附

奏曰臣効忠稟命靡敢為辭但病恙纏綿未堪抵役既而詔存審以本官充幽州盧龍節度自鎮州之任同光初加開府儀同三司檢校太傅中書令邑千戶賜號忠烈扶天啟運功臣

郭崇韜代州鴈門人也武皇用為典謁奉使鳳翔稱旨署教練使崇韜臨事機警應對可觀莊宗嗣位尤器重之天祐十四年用為中門副使專典機務艱難戰伐靡所不從十八年從征張文禮於鎮州契丹引衆至新樂

王師大恐諸將咸請退還魏州莊宗猶豫未決崇韜曰
阿保機為王郁所誘本利貨財非敦隣好苟前鋒小
遁走必矣况我新破汴寇威振北蕃乘此驅攘往無不
捷且事之濟否亦有天命莊宗從之王師果捷莊宗即
位於魏州崇韜加檢校太保守兵部尚書充樞密使是
時衛州陷於梁澶相之間寇鈔日至民流地削軍儲不
給羣情怵怵以為霸業終不能濟崇韜寢不安席俄而
王彥章陷德勝南城敵勢滋蔓汴人急攻揚劉城明宗

在鄆音驛斷絕莊宗登城四望計無從出崇韜啟曰段
凝阻絕津路苟王師不南鄆州安能保守臣請於博州
東岸立柵以固通津但慮汴人偵知徑來薄我請陛下
募敢死之士日以挑戰如三四日間賊軍未至則柵壘
成矣崇韜率毛璋等萬人夜趨博州視矛戟之端有光
崇韜曰吾聞火出兵刃破賊之兆也至博州渡河版築
晝夜不息崇韜于葭葦間據胡牀假寐覺袴中冷令左
右視之乃蛇也其忘疲勵力也如是居三日梁軍果至

城壘低痺沙土散惡戰具不完汴將王彥章杜晏球率
衆攻擊軍不得休息崇韜身先督衆四面拒戰有急即
應城垂陷俄報莊宗領親軍次西岸梁軍聞之退走因
解揚劉之圍未幾汴將康延孝來奔崇韜延于卧内訊
其軍機延孝曰汴人將四道齊舉以困我軍莊宗憂之
名諸將謀進取之策宣徽使李紹宏請棄鄆州與汴人
盟以河為界無相侵寇莊宗不悅獨卧帳中名崇韜謂
曰計將安出對曰臣不知書不能徵比前古請以時事

言之且陛下十五年起義圖霸為雪家讐國恥甲冑生
蟻虱黎人困輸輓今既纂大號河朔士庶日望盪平纔
得汝陽尺寸之地不能保守况盡有中原乎將來歲賦
不充物議容怨設若劃河為界誰為陛下守之臣自延
孝言事已來晝夜籌度料我兵力算賊事機不出今年
雌雄必決聞汴人決河自滑至鄆非舟楫不能濟又聞
精兵盡在段凝麾下王彥章日寇鄆境彼既以大軍臨
我南鄙又憑恃決河謂我不能南渡志在收復汝陽此

汴人之謀也臣謂段凝保據河壩苟欲持我臣但請留
兵守鄴保固揚劉陛下親御六軍長驅倍道直指大梁
汴城無兵望風自潰既若偽主授首賊將自然倒戈半
月之間天下必定如不決此計傍採浮譚臣恐不能濟
也今歲秋稼不登軍糧纔支數月決則成敗未知不決
則坐見不濟臣聞作舍道邊三年不成帝王應運必有
天命成敗天也在陛下獨斷莊宗蹶然而興曰正合吾
意大丈夫得則為王失則為虜行計決矣即日下令軍

中家口並還魏州莊宗送劉皇后興聖宮使繼岌至朝
城西野亭泣別曰事勢危蹶今須一決事苟不濟無復
相見乃留李紹宏及租庸使張憲守魏州大軍自揚劉
濟河是歲擒王彥章誅梁氏降段凝皆崇韜贊成其謀
也

安金全代北人世為邊將少駭果便騎射武皇時為騎
將屢從征伐莊宗之救潞州及平河朔皆有戰功累為
刺史

安審通金全之猶子也幼事莊宗累有戰功轉先鋒指揮使同光初為北京右廂馬軍都指揮使屯奉化軍四年春赴明宗急召軍趨夷門為前鋒天成初授單州刺史改齊州防禦使兼諸道先鋒馬軍都指揮使

安元信字子言代北人元信以將家子便騎射幼事武皇從平巢蔡唐僖宗光啓中吐渾赫連鐸寇雲州武皇使元信拒之信兵敗於居庸關武皇性嚴急元信不敢還遂奔定州王處存待之甚厚用為突騎都校昭宗乾

寧中處存卒子部嗣時梁軍攻河朔三鎮奔命不暇梁將張存敬軍奄至城下既無宿備部懼挈其族奔太原元信從之武皇待之如初用為鐵林軍使梁將氏叔琮之攻河東也別將葛從周自馬嶺入元信伏于榆次挫其前鋒梁將李思安之攻上黨也王師將壁高河為梁軍所逼別將秦武者尤為難敵元信與關雘之繇是梁軍解去城壘得立武皇賜所乘馬及細鎧仗遷突騎都將莊宗嗣晉王位元信從救上黨破夾寨復澤潞以功

授檢校司空遼州刺史賜玉鞍名馬栢鄉之役日晚戰
酷元信重傷莊宗自臨傳藥其年改授檢校司徒武州
刺史充內衙副都指揮使山北諸州都團練副使從莊
宗定魏博移為州刺史與梁軍對壘得勝渡元信為右
廂排陣使未幾為大同軍節度使

劉訓字遵範隰州永和人也出身行間初事武皇為馬
軍隊長漸至散將屬河中王氏昆仲有尋戈之役訓從
史儼攻陝州武皇討王行瑜以訓為前鋒後隸河中為

隰州守禦都將居無何殺刺史以郡歸莊宗歷瀛州刺史

史
劉彥琮字比德雲中人也事武皇累從征役先是絳州刺史王瓘叛武皇言於彥琮意欲致之無幾從畋於汾晉之郊彥琮奔絳瓘以為附已待之甚厚因命為親騎會瓘出獵於驅馳之際彥琮刃瓘之首來獻武皇甚竒之

袁建豐自武皇破黃巢時得於華陰年方九歲愛其精

神爽俊俾收養之漸長列於左右復習騎射補鐵林都
虞侯從破邠州王行瑜以功遷左親騎軍使轉突騎指
揮使從莊宗解圍上黨破栢鄉陣累功加右僕射左廂
馬軍指揮使明宗為內衙指揮使建豐為副北討劉守
光常身先士卒轉都教練使權蕃漢副總管莊宗入鄴
以心腹幹能選為魏府都巡檢使破劉鄩下衛磁洺三
郡有功加檢校司空授洺州刺史於臨洺西敗梁將王
遷數千人生獲將領七十餘人俄拜相州刺史徵赴河

上預戰於柳陂建豐領相州軍士行營在外委州事於
小人失於撫馭指揮使孟守謙據城以叛建豐引兵討
平之改隰州刺史

夏魯竒字邦傑青州人也初事宣武軍為軍校與主將
不協遂歸於莊宗以為護衛指揮從周德威攻幽州燕
將有單廷珪元行欽時稱驍勇魯竒與之鬪兩不能解
將士皆釋兵從觀幽州平魯竒功居多梁將劉鄩在洹
水莊宗深入致師鄩設伏於魏縣西南葭蘆中莊宗不

滿千騎汴人伏兵萬餘大譟而起圍莊宗數重魯奇遂
與玉門關烏德兒等奪命決戰自午至申俄而李存審
兵至方解魯奇持槍攜劍獨衛莊宗手殺百餘人烏德
兒等披擒魯奇傷痕徧體自是莊宗尤憐之歷磁州刺
史中都之戰汴人大敗魯奇見王彥章識之單騎追及
槍擬其頸彥章顧曰爾非余故人乎即擒之以獻莊宗
壯之賞絹千疋梁平授鄭州防禦使四年授河陽節度
使

張廷裕代北人也幼事武皇於雲中從平黃巢討王行瑜自行間漸昇為小將莊宗定魏補天雄軍左廂馬步都虞侯歷蔚慈隰三州刺史

康義誠字信臣代北三部落人也少以騎射事武皇從莊宗入魏博補突騎軍使累遷本軍都指揮使

索自通字得之太原清源人也自通少能騎射嘗於山墅射獵莊宗鎮太原時遇之於野訊其姓名即補右番廳直軍使後因從獵射中走鹿轉指揮使佐周德威攻

燕軍於涿州擒燕將郭在均從莊宗定魏博改突騎指揮使明宗即位自隨駕左右廂馬軍都指揮使授忻州刺史歲餘召還後典禁兵領韶州刺史

漢史弘肇鄭州滎澤人也弘肇少游俠無行拳勇健步日行三百里走及奔馬梁末每七戶出一兵弘肇在籍中後隸本州開道都入禁軍常在晉祖麾下遂留為親從及踐祚用為控鶴偏將高祖鎮太原奏請從行用為牙隊大將後起置武節左右指揮以弘肇為都將代州

王暉叛以城歸契丹弘肇征之身先士卒一鼓而拔加
檢校太保領雷州刺史漢國建王守恩以上黨來附虜
主命大將耿崇美率衆上太行欲取上黨高祖命弘肇
率軍應接守恩軍至潞州契丹退去翟令奇以澤州迎
降會河陽武行德遣人迎弘肇遂率衆南下與行德合
故高祖繇蒲陝赴雒如歸弘肇前鋒之功也

周何福進漢高祖乾祐中為曹州防禦使時太祖出鎮
於鄴將謀北伐奏以福進自隨及太祖入平內難以輔

佐功拜忠武軍節度使

冊府元龜卷三百四十七

欽定四庫全書

冊府元龜卷三百四十八

宋 王欽若等 撰

將帥部

立功

夫受命於朝受賑於社推轂以遣鑿門而出社金革而不厭聽鞀鼓而忘身者將帥之事也蓋五材並設未嘗去兵四征弗庭於是用武自三五之世乃有威讓之訓原野之罰焉春秋戰國革車交騫故其握戎著攻城略

地之績成斬將奪旗之効者比比有之楚漢競逐勳策可舉繇是之後或內平亂畧外攘夷寇奉辭以討有罪勵兵而翦勍敵乃能戡夷亮醜謚清邊圉鹵獲之數無等追北之威靡亢闢疆以益地平國而弔民紀功於竹帛稱伐於鐘鼎斯所謂折衝之虎臣殿邦之良帥者也孫武為吳將西破強楚入郢北威齊晉顯名諸侯孫子與有力焉

司馬穰苴為齊景公將軍將兵扞燕晉之師晉師聞之

為罷去燕師聞之度水而解於是追擊之遂取所亡邦
內故境

孫臏武之後也為齊威王師宣王二年與齊將田忌田
嬰俱伐魏敗之馬陵虜太子申而殺魏將龐涓

吳起為魯將攻齊大破之魯君疑之謝起起於是聞魏
文侯賢而事之文侯以為將擊齊拔五城

趙奢為趙將秦伐韓軍於閼與趙王令趙奢將救之大
破秦軍秦軍解而走遂解閼與之圍而歸

李牧為趙將居代鴈門大破殺匈奴十餘萬騎滅襜都

甘

反襜

路談反徐廣曰一作臨崔駰又案如淳曰胡名也在代地

破東胡降林胡單于

奔走其後十餘歲匈奴不敢近趙邊城趙悼襄王元年

廉頗既亡入魏趙使李牧攻燕拔武遂方城居二年龐

煖破燕軍殺劇辛後七年秦破趙殺將扈輒於武遂城

斬首十萬趙乃以李牧為大將軍擊秦軍於宜安大破

秦軍走秦將栢齮封李牧為武安君居三年秦攻番吾

李牧擊破秦軍南距韓魏

廉頗者為趙將惠文王十六年伐齊大破之取晉陽拜
為上卿自邯鄲圍解五年而燕用栗腹之謀舉兵擊趙
趙使廉頗將大破燕軍於鄣殺栗腹遂圍燕割五城請
和乃聽之二十年廉頗東攻齊破其一軍居二年廉頗
復伐齊幾拔之

幾邑名也案趙世家惠文王二十三年廉頗將攻魏之幾邑取之而趙世家及

年表無伐齊幾拔之事實幾是邑名屬齊或云屬魏耳田丹在齊不得至於拔也

後三年廉頗

攻魏之防陵安陽拔之

樂毅為燕亞卿昭王使毅約趙惠文王別使連楚魏令

趙啗秦

啗進說之意

以伐齊之利諸侯害齊湣王之驕暴皆

爭合從與燕伐齊毅還報昭王悉起兵使樂毅為上將
軍趙惠文王以相國印授毅毅於是并護趙楚韓魏燕
之兵伐齊破之濟西諸侯兵罷歸而燕軍獨追至于臨
淄齊湣王之敗濟西亡走保於莒毅獨留徇齊齊皆城
守毅攻入臨淄盡取齊寶財物祭器輸之燕昭王大悅
親至濟上勞軍行賞饗士封毅於昌國屬齊號為昌國君
於是昭王收齊國獲以歸而使毅復以兵平齊城之不

下者殺留徇齊五歲下齊七十餘城皆為郡縣以屬燕
秦商鞅孝公時為大良造將兵圍魏安邑降之又襲虜
魏公子卬因攻其軍盡破之

樗里子名疾惠王弟也惠王八年使將而伐晉曲沃盡
出其人取其城地入秦二十五年伐趙虜趙將軍莊豹
拔蘭明年助魏章攻楚敗楚將屈丐取漢中地秦封樗
里子號為嚴君

甘茂惠王時為將佐魏章畧定漢中地惠王卒武王立

張儀魏章去東之魏蜀侯輝相壯反秦使甘茂定蜀還
而以甘茂為左丞相

魏冉封穰侯為秦將攻魏魏獻河東方四百里拔魏之
河內取城大小六十餘昭王三十二年為相國將兵攻

魏走芒卯

芒莫卯切
卯陌飽切

入北宅三十三年魏背秦與齊從

親秦使穰侯伐魏斬首四萬走魏將暴鳶得魏三縣明
年穰侯與白起客卿胡陽復攻趙韓魏破芒卯於華陽

下斬首十萬取魏之卷

丘權切

蔡陽長社趙氏觀津

白起郿人也昭王十三年爲左庶長將而擊韓之新城

明年爲左更攻韓魏於伊闕斬首二十四萬又虜其將

公孫喜拔五城起遷爲國尉涉河取韓安以東到乾音

河今河東聞喜縣北有乾河口因名明年起爲大良造

攻魏拔之取城大小六十一明年起與客卿錯攻垣城

拔之河東垣縣後五年攻趙拔光狼城後七年攻楚拔鄢鄧

五城昭王二十八年其明年攻楚拔郢燒夷陵遂東至竟陵楚

王亡去郢東走徙陳秦以郢爲南郡起遷爲武安君因

取楚定巫黔中郡昭王三十四年攻魏拔華陽走芒卯
而虜三晉將斬首十三萬與趙將賈偃戰沈其卒二萬
人於河中昭王四十三年攻韓涇城拔五城斬首五萬
四十四年攻南陽太行道絕之北南陽河內
脩武是也四十五年
伐韓之野王

秦王齧為左庶長昭王四十七年秦使齧音核攻韓取上

黨民走趙趙軍長平在注
氏以按據上黨民四月齧因攻

趙趙使廉頗將趙軍士卒犯秦斥兵秦斥兵斬趙裨將

茄六月陷趙軍取二鄆四尉七月趙軍築壘而守之
秦又攻其壘取二尉敗其陣奪西壘壁廉頗堅壁以待
秦秦數挑戰趙軍不出趙王數以為讓九月趙卒不得
食四十六日皆內陰相殺食來攻秦壘欲出為四隊
四五復之不能出其將軍趙括出銳卒自搏戰秦軍射
殺趙括括軍敗前後斬首虜四十五萬人趙人大震四
十八年十月秦復定上黨郡秦分軍為二王齧攻皮牢
拔之司馬梗定太原

王翦為秦將始皇十一年翦將攻趙閼與破之拔九城
十八年攻趙歲餘遂拔趙趙王降盡定趙地為郡明年
燕使荊軻為賊於秦秦王使王翦攻燕燕王喜走遼東
翦遂定燕薊而還翦後將六十萬人擊荊大破荊軍至
蘄南殺其將軍項燕荊兵遂敗走秦因乘勝畧定荊地
城邑歲餘虜荊王負芻竟平荊地為郡縣因南征百越
之君

翦子贲為秦將擊荊

秦諱楚故云荊

荊兵敗還擊魏魏王降遂

定魏地後與李信破定燕齊地始皇二十六年盡并天下王氏蒙氏功為多名施於後世

蒙騫為上卿莊襄王元年為秦將伐韓取成臯滎陽作置三川郡二年攻趙取三十七城始皇三年蒙騫攻韓取十三城攻魏取二十城作置東郡

騫子武始皇二十三年為秦裨將軍與王翦攻楚大破之殺項燕二十四年攻楚虜楚王負芻

武子恬因家世得為秦將始皇二十六年攻齊大破之

拜為內史秦已并天下乃使蒙恬將三十萬衆北逐戎

狄收河南築長城因地形用險制塞起臨洮屬山至遼

東延袤萬餘里於是渡河至陽山五原西安陽縣北有陰山陰山在河內陽

山在河北

李信為將嘗以兵千人逐燕太子丹於衍水中卒破得

丹

漢周勃高帝六年以將軍從擊燕王臧荼破之易下今易

縣臣欽若等曰勃漢五年以前從攻項籍並具將帥佐命門韓彭英盧皆放此所將卒當馳道

為多

當高祖所行之前

七年以將軍從高帝擊韓王信於代降

下霍人以前至武泉

縣屬雲中

擊胡騎破之武泉北轉攻信

軍銅鞮破之還降太原六城擊韓信胡騎晉陽下破之

下晉陽復擊信軍於砮石

地名砮石音沙

破之追北八十里還

攻樓煩三城因擊胡騎平城下所將卒當馳道為多十

年以太尉擊陳豨屠馬邑將卒斬豨將軍乘

去聲

馬絺

姓乘

馬名絺也轉擊韓王信陳豨趙利軍於樓煩破之得豨將宋

最鴈門守囿

囿音下頓切鴈門守之名

因轉攻得雲中守遼丞相箕

肆將軍勲

逃古達字肆音離二切勲者亦豨將之名

定鴈門郡十七縣雲中

郡十二縣因復擊豨靈丘破之斬豨得豨丞相程縱將軍陳

武都尉高肆定代郡九縣十三年燕王盧綰反勃以相

國代樊噲將擊下薊

音計幽州縣名

得綰大將丞相偃守陘

音刑

盧綰郡守

陘其名也

太尉弱御史大夫施屠渾都

姓施屠名渾都渾音胡昆切

破綰軍上闌後擊綰軍沮陽

沮音阻縣名屬上谷

追至長城定上

谷十二縣右北平十六縣遼東二十九縣漁陽二十二

縣最從高帝得相國一人

最者凡也摠言其攻戰克獲之數

丞相二人

將軍二千石各三人別破軍二下城三定郡五縣七十
九得丞相大將各一人

樊噲高帝六年以將軍從攻臧荼於燕虜荼定燕地七

年以將軍從攻韓王信於代自霍人以往至雲中與絳

侯周勃共定之十年擊陳豨與曼丘臣軍戰襄國破栢人

先登降之定清河恒山凡二十七縣殘東垣殘謂多遷

為左丞相破得綦母卯尹潘軍於無終廣昌姓綦母名卯綦音其

破豨別將胡人王黃軍於代南因擊韓王信軍於參合

所將卒斬信擊豨胡騎橫谷斬將軍趙既虜代丞相馮

梁守孫奮大將軍王黃將軍太卜太僕解福

人姓名

等十

人與諸將共定代鄉邑七十三後燕王盧綰反噲以相

國擊綰破其丞相抵薊南

抵丁禮切至也一說抵者其丞相之名也

定燕縣

十八鄉邑五十一噲從高帝斬首百七十六級虜二百

八十八人別破軍七下城五定郡六縣五十二得丞相

一人將軍十三人二千石以下至三百石十二人

酈商高帝六年以將軍從擊臧荼戰龍脫

地名

破荼軍易

下卻敵遷為右丞相別定上谷因攻代受趙相國印與

絳侯等定代郡鴈門得代丞相程縱守相郭同

守相謂為相而

居守者

將軍以下至六百石十九人後以右丞相擊豨殘

東垣又從擊黥布攻其前垣

謂攻其壁壘之前垣

陷兩陣得以破

布軍凡別破軍三降定郡六縣七十三得丞相守相大將軍各一人小將二人二千石以下至六百石十九人

夏侯嬰高帝七年以太僕從擊韓王信軍胡騎晉陽大

破之又從擊胡騎句注北大破之又擊胡騎平城南三
陷陳功為多從擊陳豨黥布陷陳卻敵

灌嬰高帝七年以車騎將軍從擊韓王信於代至馬邑
別降樓煩以北六縣斬代左相破胡騎將於武泉北復
從擊信胡騎晉陽下所將卒斬胡白題將一人

胡名也

又

從擊陳豨別攻豨丞相侯敞軍曲逆下破之卒斬敞及
特將五人

卒謂所將之卒特獨也各獨為也

降曲逆盧奴上曲陽安國

安平攻下東垣黥布反以車騎將軍先出攻布別將於

相破之斬亞將樓煩將三人又進擊破布上柱國及大
司馬軍又進破布別將肥銖嬰身生得左司馬一人所
將卒斬其小將十人追北至淮上凡從所得二千石二
人別破軍十六降城四十六定國一郡二縣五十二得
將軍二人柱國相各一人二千石十人

斬歙

音翕

高帝七年以騎都尉從擊韓王信於平城下還

軍東垣有功遷為車騎將軍并將梁趙齊燕楚車騎別
擊陳豨丞相敵破之

侯敵

因降曲逆從擊黥布有功凡斬

首九十級虜一百三十二人破別軍十四降城五十九
定郡國各一縣二十二得王柱國各一人二千石以下
至五百石三十九人

郭蒙為將軍高帝十年代相國陳豨反帝在邯鄲豨將
侯敞將萬餘人遊行王黃將騎千餘軍曲逆張春將卒
萬餘人渡河攻聊城蒙與齊將擊大破之

周亞夫景帝三年以中尉為太尉東擊吳楚會兵滎陽

會集也

吳方攻梁亞夫東北走昌邑

走音泰

使輕騎兵弓高

侯等絕吳楚兵後食道吳楚既餓迺引而去亞夫出精

兵追擊大破吳王濞

音匹
備切

吳王濞棄其軍與壯士數千

人亡走保於江南丹徒漢兵因乘勝遂盡虜之降其兵

月餘越人斬吳王頭以告凡相守攻三月而吳楚破平

是時樂布衛綰程嘉公孫渾邪

渾音胡溫切
邪音嗟以切

蘇息直不

疑皆以將軍擊吳楚有功封侯

衛青武帝元光六年以車騎將軍擊匈奴出上谷至籠

城籠讀與
龍同

斬首虜數百賜爵關內侯元朔元年秋復將

三萬騎出鴈門斬首虜數千明年復出雲中西至高闕

高闕山名一曰塞名在朔方之北

遂至于隴西捕首虜數千畜百餘萬

走白羊樓煩王遂取河南地為朔方郡

當北地之北以黃河之南也

三千八百戶封青為長平侯五年春令青將三萬騎出

高闕衛尉蘇建為游擊將軍左內史李沮為彊弩將軍

沮音子余

太僕公孫賀為騎將軍代相李蔡為輕車將軍皆

領屬車騎將軍俱出朔方大行李息岸頭侯張次公為

將軍俱出右北平匈奴右賢王當青等兵以為漢兵不

能至此飲醉漢兵夜至圍右賢王右賢王驚夜逃獨與
其愛妾一人騎數百馳潰圍北去漢輕騎校尉郭成等
追數百里弗得得右賢裨王十餘人衆男女萬五千餘
人畜數十百萬于是引兵而還至塞天子使使者持大
將軍印即軍中拜青為大將軍諸將皆以兵屬立號而
歸明年春青以大將軍出定襄合騎侯公孫敖為中將
軍太僕公孫賀為左將軍翕侯趙信為前將軍衛尉蘇
建為右將軍郎中令李廣為後將軍左內史李沮為彊

弩將軍咸屬大將軍斬首數千級而還月餘悉復出定襄斬首虜萬餘人是歲趙信奔降單于元狩四年帝與諸將議曰翁侯趙信為單于畫計常以為漢兵不能度

幕輕留今大發卒其勢必得所欲乃令青與驃騎將軍

霍去病

驃音頻
妙切

各五萬騎步兵轉者踵軍數十萬

轉者
謂運

轉車也
踵接也

而敢力戰深入之士皆屬去病去病始為出定

襄當單于捕虜虜言單于東廼更令去病出代郡令青出定襄郎中令李廣為前將軍太僕公孫賀為左將軍

主爵趙食其為右將軍

食音異其音基

平陽侯曹襄為後將軍

皆屬大將軍趙信為單于謀曰漢兵即度幕人馬罷

罷讀

曰匈奴可坐收虜耳迺悉遠北其輜重皆以精兵待幕

北而適直青軍出塞千餘里

直讀曰值

見單于兵陳而待於

是青今武剛車自環為營而縱五千騎往當匈奴匈奴

亦從萬騎會日且入而大風起沙礫擊面兩軍不相見

漢益縱左右翼統單于單于視漢兵多而士馬尚彊戰

而匈奴不利薄暮單于遂乘六羸壯騎可數百直冒漢

圍西北馳去

冒犯也音莫克切

昏漢匈奴相紛拏殺傷大當漢

軍左校捕虜言單于未昏而去漢軍因發輕騎夜追之

青因隨其後匈奴兵亦散走會明行二百餘里不得單

于頗捕斬首虜萬餘級遂至寘顏山趙信城

趙信降匈奴匈奴為

築城居之

得匈奴積粟食軍

食音嗣

軍留一日而還悉燒其城

餘粟以歸青軍入塞凡斬首虜萬九千級青凡七出擊

匈奴斬捕首虜五萬餘級一與單于戰收河南地置朔

方郡其裨將及校尉侯者九人護軍都尉公孫敖為合

騎侯都尉韓說龍頗侯騎將軍公孫賀南窳侯

窳亦作卯音番

教切

輕車將軍李蔡樂安侯校尉李朔陟軹侯趙不虞隨

成侯公孫戎奴從平侯張騫博望侯上谷太守郝賢衆
利侯將軍李沮李息及校尉豆如意中郎將綰皆有功
賜爵關內侯

霍去病為票姚校尉

票姚音飄搖一說票音頗妙切姚音羊名切

再從大將

軍與輕勇騎八百直棄大將軍數百里斬首捕虜二千
二十八級得相國當戶斬單于大父行籍若侯產

籍若胡侯

也產名也此人單于祖父之行也行音胡良切

捕季父羅姑比再冠軍

羅姑名也亦單

于之季父也

比音頻寐切 迺以二千五百戶封去病為冠軍侯元狩

三年春以去病為驃騎將軍將萬騎出隴西過焉耆山

千餘里得胡首虜八千餘級得休屠王祭天金人

匈奴祭天

處本在栗陽甘泉山下秦擊奪其地後徙之休屠王右地故休屠有祭天金人象也作金人以為天神之主而祭之今佛像 其夏驃騎將軍復與合騎侯數萬騎出隴

是其道法

西北地二千里過居延祁連山得胡首虜三萬餘級裨

小王以下十餘人其後匈奴渾邪王休屠王欲降漢武

帝恐其詐乃令去病將兵往迎之去病將兵渡河渾邪
裨王見漢兵多不欲降頗遁去去病馳入與渾邪王相
見斬其欲亡者八千人先遣渾邪王詣行在去病盡將
其衆渡河衆號十萬廼分處降者於邊五郡故塞外而
皆在河南因其故俗為屬國乃以千七百戶益封去病
四年大將軍衛青出定襄去病出代右北平二千餘里
直左方兵直當也所斬捕功多於青以五千八百戶封去
病去病凡六出擊匈奴其四出以將軍再出為票斬首
姚校尉也

虜十一萬餘級渾邪王以衆降數萬開西河酒泉之地

西方益少胡寇其校吏司馬趙破奴封從票侯校尉高

不識宜寇侯僕多輝渠侯

輝音許
韋切

右北平太守路博德

邳離侯北地都尉衛山義陽侯匈奴歸義復陸支

復音
芳日

切

杜侯伊即軒

音若
言切

衆利侯

趙食其以主爵都尉從大將軍斬首六百六十級元狩

三年賜爵關內侯

揚僕元鼎五年秋以主爵都尉為樓船將軍與伏波將

軍邳離侯路博德平南粵樓船將軍出豫章下橫浦將精卒先陷尋陘破石門得粵船粟因推而前挫粵鋒以粵數萬人待伏波將軍伏波將軍將罪人道遠後期與樓船會迺有千餘人遂俱進樓船居前至番禺粵王建德與其相呂嘉皆城守樓煩自擇便處居東南面伏波居西北面會暮樓船攻敗粵人縱火燒城遲旦城中皆降伏波呂嘉建德以夜與其屬數百人亡入海伏波又問降者知嘉所之遣人追故騎校司馬蘇弘得建德粵

郎都稽得嘉

越中所置也稽音雞

南粵平伏波將軍益封樓船將

軍以摧鋒陷堅為將梁侯又封蘇弘為海常侯

韓說

音悅

元鼎六年秋以待詔為橫海將軍與樓船將軍

楊僕中尉王溫舒平東粵說出句章

會稽之縣

浮海從東方

往僕出武林溫舒出梅嶺元封元年冬咸入東粵自兵

未往故粵衍侯吳陽前在漢漢使歸諭東粵王餘善不

聽及橫海軍至陽以其邑七百人反攻粵軍於漢陽及

故粵建成侯敖與繇王居股謀俱殺粵王餘善以其眾

降橫海將軍為案道侯校尉劉福為繚婁侯

繚音遼
婁音嬰

李廣利太初四年為貳師將軍擊大宛宛兵迎擊漢兵

漢兵射敗之宛兵入保其城攻之四十餘日宛貴人殺

其王毋寡

毋寡宛王名殺
漢使者故誅之

迺出其馬令漢自擇漢軍取

其善馬數十匹中馬以下牝牡三千餘匹而立宛貴人

故時遇漢善者名昧秦為宛王

昧音未秦
音干蜀切

貳師將軍之

東出

謂旋軍
東出

所過小國聞宛破皆使其子弟從入貢獻

因為質馬封廣利為海西侯食邑八千戶初貳師起燉

煌為人多道上國不能食

起發也道上國近道諸國也食讀曰飮

分為數

軍從南北道校尉王申生故鴻臚壺充國等千餘人別

至郁成城守不肯給食申生去大軍二百里負而輕之

負恃也持大軍之威而輕敵人

攻郁成急郁成窺知申生軍少晨用三

千人攻殺申生等數人脫亡走貳師

走音奏

貳師令搜粟

都尉上官桀往攻破郁成郁成降其王亡走康居桀追

至康居康居聞漢已破宛出郁成王與桀桀令四騎士

縛守詣大將軍

時多利將故謂二師為大將軍

上邽騎士趙弟拔劍擊

斬郁成王桀等遂追及大將軍封趙弟為新時侯軍正
趙始成功最多為光祿大夫上官桀敢深入為少府李
哆有計謀為上黨太守

哆音昌
野切

軍官吏為九卿者三人

諸侯相郡守二千石百餘人千石以下千餘人

范明友昭帝元鳳三年以中郎將為度遼將軍將二萬
騎出遼東擊烏桓斬首六千餘級獲三王首還封為平
陵侯

趙充國昭帝時以大將軍護軍都尉將兵擊武都反氏

音丁
奚切

定之還為水衡都尉擊匈奴獲西祁王

匈奴
王也

宣帝

本始中為蒲類將軍征匈奴斬虜數百級神爵元年先零諸羌反充國以後將軍引兵至先零所在虜久屯聚

解弛

解亭解
弛放也

望見大軍棄車重欲度湟水

重音貢
用切

道阨

狹充國徐行驅之虜赴水溺死者數百降及斬首五百餘人鹵馬牛羊十萬餘頭車四千餘兩

音諒

又與彊弩將

軍許壽擊西羌充國所降復將五千餘人

常惠本始二年以光祿大夫使烏孫公主及昆彌皆遣

使因惠言匈奴連發大兵擊烏孫取車延惡師地收其
人民去使使脅求公主欲隔絕漢昆彌發國半精兵自
給人馬五萬騎盡力擊匈奴唯天子出兵以救公主昆

彌於是漢大發十五萬騎五將軍分道出

五將軍謂祁連將軍田廣

明蒲類將軍趙充國武牙將軍田順度遠將軍范明友前將軍韓增

以惠為校尉持節護

烏孫兵昆彌自將翎侯以下五萬餘騎

翎即翁字也翎侯烏孫官號也

從西方入至右谷蠡庭

谷音鹿蠡音黎

獲單于父行及嫂居次

匈奴

女號若言公主也行胡浪切

名王騎將以下三萬九千人得馬牛驢

羸索化五萬餘匹羊六十餘萬頭烏孫皆自取鹵獲

陳湯為西城副校尉與都護甘延壽破郅支單于斬閼氏太子名王以下千五百一十八級生虜百四十五人降虜千餘人

段會宗成帝時為左曹中郎將烏孫小昆彌未振將

其名

也殺大昆彌會病死漢恨誅不加元延中遣會宗發戊

己校尉諸國兵即誅未振將太子番丘會宗恐大兵入烏孫驚番丘亡逃不可得即留所發兵墊婁地選精兵

三千弩徑至昆彌所在名番丘責以未振將骨肉相殺
殺漢公主子孫未伏誅而死使者受詔誅番丘即手劍
擊殺番丘官屬以下驚恐馳歸天子賜會宗爵關內侯
後漢鄧禹光武建武元年以大司徒與積弩將軍馮愔
驍騎將軍樊崇車騎將軍宗欽建威將軍鄧尋赤眉將
軍耿訢軍師將軍左于西討赤眉既渡汾陰河入夏陽
更始中郎將左輔都尉公乘欽引其衆十萬與左馮翊
兵共拒禹於衛禹復破走之

馮異建武二年以孟津將軍引擊陽翟賊嚴終趙根破之時赤眉延岑暴亂三輔郡縣大姓各擁兵衆大司徒鄧禹不能定乃遣異代禹討之所至皆布威信弘農羣盜稱將軍者十餘輩皆棄衆降異異與赤眉遇于華陰相拒六十餘日戰數十合降其將劉始王宣等凡五千餘人三年春拜異為征西大將軍破赤眉於嶠底降男女八萬人餘衆尚十餘萬東走宜陽時延岑據藍田王歆據下邳芳丹據新豐

芳作茅

蔣震據霸陵張邯據長安

公孫守據長陵楊周據谷口呂鮪據陳倉角閼據汧路
蓋延據盩厔任良據鄠汝各稱將軍擁兵多者萬餘少
者數千人轉相攻擊異且戰且行屯軍上林苑中延岑
既破赤眉自稱武安王拜置牧守欲據關中引張邯任
良共攻異異擊破之斬首千餘級諸營保守附岑者皆
來降歸異岑走攻折異遣復漢將軍鄧曄輔漢將軍于
匡要擊岑大破之降其將蘇臣等八千餘人岑遂自武
關走南陽異乃稍誅擊豪傑不從令者寔賞降附有功

勞者悉遣其渠帥詣京師散其衆歸本業威行關中唯
呂鮪張邯蔣震遣使降蜀其餘悉平明年公孫述遣將
程焉將數萬人就呂鮪出屯陳倉異與右扶風趙匡迎
擊大破之焉退走漢川異追戰於箕谷復破呂鮪營保
降者甚衆其後蜀復數遣將間出異輒挫之六年朝京
師是時諸將上隴為隗囂所敗乃詔異軍柁邑未及至
隗囂乘勝使其將王元行巡將二萬餘人下隴因分遣
巡取柁邑異即馳兵乘其不意卒擊鼓建旗而出巡軍

驚亂奔走追擊數十里大破之征虜將軍祭遵亦破王

元於汧於是使異進軍義渠

北地縣名

并領北地太守事青

山胡率萬餘人降異異又擊盧芳將賈覽匈奴真鞬日

逐王破之上郡安定皆降異復領安定太守事九年春

祭遵卒詔異守征虜將軍并將其營及隗囂死其將王

元周宗等復立囂子純猶摠兵據冀公孫述遣將趙匡

等救之帝復令異行天水太守事攻匡等且一年皆斬

之

岑彭建武二年行大將軍事擊荊州下犍葉等十餘城
是時南方尤亂南郡人秦豐據黎邱自稱楚黎王畧十
有二縣董訢起堵鄉許邯起杏

南陽復陽
縣有杏聚

又更始諸將

各擁兵據南陽諸城彭破杏降訢邯遷征南大將軍三
年夏光武自將南征至葉董訢別將數千人遮道車騎
不可得前彭奔擊大破之車駕既還令彭率傅俊臧宮
劉宏等三萬餘人南擊秦豐拔黃郵豐與其大將蔡宏
拒彭等於鄧數月不得進帝怪以讓彭彭懼於是夜勒

兵馬申令軍中使明旦西擊山都乃緩所獲虜令得逃
亡歸以告豐豐即悉其軍西邀彭彭乃潛兵渡沔水擊
其將張揚於阿頭山大破之從川谷間伐木開道直襲
黎邱擊破諸屯兵豐聞大驚馳歸救之彭與諸將依東
山為營豐與蔡宏夜攻彭彭豫為之備出兵逆擊之豐
敗走追斬蔡宏更封彭為舞陰侯秦豐相趙京舉宜城
降拜為成漢將軍與彭共圍豐於黎邱時田戎擁眾夷

陵

東觀記曰田戎西平人與同郡人陳義客夷陵為虜
盜更始元年義戎將兵陷夷陵義自稱黎邱大將軍

戎自稱掃地大將軍襄陽耆舊記曰戎號周成王義稱臨江王聞秦豐被圍懼大兵方

至欲降而妻兄辛臣諫戎曰今四方豪傑各據郡國雒陽地如掌耳不如按甲以觀其變戎曰以秦王之彊猶為征南所圍豈況吾邪降計決矣四年春戎乃留辛臣守夷陵自將兵沿江沂沔止黎邱刻期日當降而辛臣於後盜戎珍寶從間道先降於彭而以書招戎戎疑必賣已遂不敢降而反與秦豐合彭出兵攻戎數月大破之其大將伍公詣彭降戎亡歸夷陵帝幸黎邱勞軍封

彭吏士有功者百餘人彭攻秦豐三歲斬首九萬餘級
豐餘兵裁千人又城中食且盡帝以豐轉弱令朱祐代
彭守之使彭與傅俊南擊田戎大破之遂拔夷陵追至
秭歸戎與數十騎亡入蜀盡獲其妻子士衆數萬人十
一年春彭與大司馬吳漢及誅虜將軍劉隆輔威將軍
臧宮驍騎將軍劉歆發南陽武陵南郡兵又發桂陽零
陵長沙委輸棹卒凡六萬餘人

棹卒持棹行船者
一作推音直教切騎五

千匹皆會荆門吳漢以三郡棹卒多費糧穀欲罷之彭

以為蜀兵盛不可遣上書言狀帝報彭曰大司馬習用步騎不曉水戰荆門之事一繇征南公為重而已彭乃令軍中募攻浮橋先登者上賞於是偏將軍魯竒應募而前時天風狂急彭竒船逆流而上直衝浮橋而攢柱鈎不得去竒等乘勢殊死戰因飛炬焚之風怒火盛橋樓摧燒彭復悉軍順風並進所向無前蜀兵大亂溺死者數千人斬任滿生獲程汎而田戎亡保江州彭上劉隆為南郡太守自率臧宮劉歆長驅入江關令軍中無

得虜掠所過百姓皆奉牛酒迎勞彭見諸耆老為言大漢哀愍巴蜀久見虜役故興師遠伐以討有罪為人除害讓不受其牛酒百姓皆大悅爭開門降詔彭守益州牧所下郡輒行太守事彭到江州以田戎食多難卒拔留馮駿守之自引兵乘利直指墊江攻破平曲收其米數十萬石公孫述使其將延岑呂鮪王元及其弟恢悉兵拒廣漢及資中又遣將侯丹率二萬餘人拒黃石彭乃多張疑兵使護軍楊翕與臧宮拒延岑等自分兵浮

江下還江州沂都江而上襲擊侯丹大破之因晨夜倍道兼行二千餘里徑拔武陽使精騎馳廣都去成都數十里勢若風雨所至皆奔散

賈復建武元年以執金吾先渡河攻更始將朱鮪於雒陽與白虎公陳僑戰連破降之二年與騎都尉陰識驍騎將軍劉植南度五社津擊更始郾王尹尊連破之月餘尊降盡定其地引東擊更始淮陽太守暴汜汜降屬郡悉定其秋南擊召陵新息平定之明年春遷左將軍

別擊赤眉於新城澠池間連破之

吳漢為大司馬以建武二年率大司空王梁建義大將軍朱祐大將軍杜茂執金吾賈復揚化將軍堅鐔偏將軍王霸騎都尉劉隆馬武陰識共擊檀鄉賊於鄴東漳水上大破之降者十餘萬人復率諸將擊鄴西山賊黎伯卿等及河內脩武悉破諸屯聚復進兵南陽擊宛涅陽鄴穰新野諸城皆下之引兵南與秦豐戰黃郵水上破之又與偏將軍馮異擊昌城五樓賊張文等又攻銅

馬五幡於新安皆破之明年春率建威大將軍耿弇虎
牙大將軍蓋延擊青犢於軹西大破降之明年又率陳
俊及前將軍王梁擊五校賊於臨平追至東郡箕山大
破之北擊清河長直及平原五里賊皆平之

長直一作長植在河

南不得言北擊當是賊號或地名也

時鬲縣五姓共逐守長據城而反

鬲音

革縣名屬平原郡五姓蓋當土疆宗象右也

漢大破其衆因追討餘黨至無

鹽縣名屬東平

進擊勃海皆平之又從征董憲圍朐城明年

春拔朐斬憲東方悉定十一年春率征南大將軍岑彭

等伐公孫述及彭破荊門長驅入江關漢留夷陵裝露

橈船

橈短楫也
音人連切

將南陽兵及弛刑募士三萬人沂江而

上會岑彭為刺客所殺漢并將其軍十二年春與公孫

述將魏黨公孫永戰於魚涪津大破之十五年復率揚

武將軍馬成捕虜將軍馬武北擊匈奴徙鴈門代郡上

谷吏人六萬餘口置居庸常關以東十八年蜀郡守將

史歆反於成都自稱大司馬攻太守張穆穆踰城走廣

都歆遂移檄郡縣而宕渠楊偉胸臆徐容等起兵各數

千人以應之帝以歆昔為岑彭護軍曉習兵事故遣漢
率劉尚及大中大夫臧宮將萬餘人討之漢入武都乃
發廣漢巴蜀三郡兵圍成都百餘日城破誅歆等漢乃
乘桴沿江下巴郡楊偉徐容等惶恐解散漢誅其渠帥
二百餘人徙其黨與數百家於南郡而還

蓋延建武二年以虎牙將軍南擊教倉轉攻酸棗封丘
皆拔其夏督駙馬都尉馬武騎都尉劉隆護軍都尉馬
成偏將軍王霸等南伐劉永先攻拔襄邑進取麻鄉

縣名

故城在今碭山縣東北

遂圍劉永於淮陽數月盡收野麥夜梯其

城入永驚懼引兵走出東門延追擊大破之永棄軍走
譙延進攻拔薛斬其魯郡太守而彭城扶陽杼秋蕭皆
降又破永沛郡太守斬之永將蘇茂佼彊周建等三萬
餘人共攻延延與戰於沛西大破之永軍亂遁沒溺死
者大半永棄城走湖陵蘇茂奔廣樂延遂定沛楚臨淮
三年睢陽復反城迎劉永延復率諸將圍之百日收其
野穀永乏食突走延追擊盡得輜重永為其將所殺永

弟防舉城降四年春延又擊蘇茂周建於蘄進與董憲
戰留下皆破之因率平敵將軍龐萌攻西防拔之復追
敗周建蘇茂於彭城茂建亡奔後從征董憲於昌慮皆
破平之六年春遣屯長安九年隗囂死延西擊街泉略
陽清水諸屯聚皆定

陳俊建武五年以琅邪太守行大將軍事將兵擊董憲

於贛榆

贛榆縣名屬東海郡贛音貢

進破朐賊孫陽平之八年張步

畔還琅邪俊追討斬之帝美其功詔俊得專征青徐

臧宮為騎都尉建武二年將突騎與征虜將軍祭遵擊

更始將左防韋顏於沮陽

韋一作韓

龐參降之三年將兵徇

江夏擊代鄉鍾武竹里皆下之光武使大中大夫持節

拜宮為輔威將軍七年擊梁郡濟陰皆平之十一年與

諸將伐公孫述軍至平陽鄉蜀將王元舉眾降進拔緜

竹破涪城斬公孫述弟恢復攻繁郫前後收得節五印

綬千八百是時大司馬吳漢亦乘勝進營逼成都宮連

屠大城兵馬旌旗甚盛乃乘兵入小雒郭門歷成都城

下至吳漢營飲酒高會漢見之甚歡謂宮曰將軍向者
經虜城下震揚威靈風行電焰然窮寇難量還營願從
他道矣宮不從復路而歸賊亦不敢近之進軍咸門與
吳漢並滅公孫述

冊府元龜卷三百四十八